

**Nilufar M. TUYCHIEVA,**  
Teacher of the ICESCO Department  
of Islamic Studies and Civilization  
of the International Islamic academy of Uzbekistan.  
A.Kadiri str. 11, 100011, Tashkent, Uzbekistan  
E-mail: nilufartuychieva79@gmail.com

DOI: 10.47980/MOTURIDIY/2022-2/7

## ТУРКИСТОН МАТБУОТИДА МАРКАЗИЙ ОСИЁ ҚАЛАНДАРЛАРИ ФАОЛИЯТИНИНГ ЁРИТИЛИШИ

## THE MANIFESTATION OF THE ACTIVITIES OF THE CENTRAL ASIAN QALANDARS IN THE PRESS OF TURKESTAN

## ОСВЕЩЕНИЕ ДЕЯТЕЛЬНОСТИ КАЛАНДАРОВ ЦЕНТРАЛЬНОЙ АЗИИ ПРЕССОЙ ТУРКЕСТАНА

### КИРИШ

Туркистон маҳаллий матбуотида Марказий Осиёдаги тариқатлар, оқимлар, тасаввуф вакиллари бўлмиш эшонлар, шайхлар, қаландарлар, дарвешлар ҳақида хабарлар ёритилган. Уларнинг маҳаллий аҳоли маънавий ҳаётини ёритишда ўзига хос ўрин тутгани сир эмас. Тариқатларнинг зикр маросимлари, кийиниш услублари рус расмий матбуотида этнографик тадқиқот сифатида ёритилган. Миллий матбуот саҳифаларида эса сохта, “шариатдан бехабар, аммо амалда тариқатни даъво қилувчи” шайхлар, эшонлар, дарвеш ва қаландарлар фаолияти танқид остига олинган. Сўфийларнинг фаолияти асл моҳиятидан узоқлашган тариқат вакиллари сифатида баҳоланиб, миллий матбуотда чоп этилган мақолаларда тариқатчилар фаолиятини назорат қилиш, халқда диний маърифатни юксалтириш каби масалалар долзарб мавзу сифатида кўтарилиган. Расмий рус матбуотида тариқатлар ва тасаввуф вакиллари, айниска, бу даврда эшонлар фаолияти қаттиқ танқидга учраб, аксарият мақолаларда улар Дукчи эшон тимсолида “сиёсий-

диний хавф солувчи куч” сифатида кўрсатилган (Абдулҳаким Саримсоқов, 1914).

### АСОСИЙ ҚИСМ

Исмоилбек Гаспринский ўзининг 1900 йилда Бокуда чоп этилган “Туркистон уламоси” номли китобида Туркистон уламолари ҳақида тўхталар экан, асарнинг бир фаслини маҳсус фаҳиҳларга (диний соҳа вакилларига) бағишилаган. Мазкур даврдаги қолоқликларни, алам билан тилга олган. Жумладан, XIX асрнинг охирида яшаган ва дунё кўрган зиёлиларнинг бирортаси ҳам Туркистоннинг ўша даврдаги аҳволидан қониқмаслигини очиқ айтган. Исмоилбек хонликлар салтанатининг сўнгги даври аҳволини шундай баён қилган:

“Шоҳ Темур замонинда ҳар бири бир арслон ўлан туркистонийлар бу замонда таъсири зулм ва истибодод ила бирор сочсиз хотин, соқолли заифалар поясина кирмиш эди. Эски илм ва уламодан ҳам деярли асар қолмаган. Холис ва ҳалол (киши) қолмай, узун чопонларга, хильъатларга ўралган риёкор кўпайган эди. Золимлар йўлини тўсадиган шариат аҳли тугаб, золимларга фатво топиб бериб, 5–10 тилла-олтун учун сабоҳдан оқшома қадар “омин”, “омин” айтиб, миллатни хароб ва барбод этганлар саноқсиз эди. Қандай баҳтсизликки, бир учи Садди Чинга, дигар учи Ўрта Ер денгизига чиққан салтанат баҳодирларининг авлоди ёшлиқда баччалик, сўнг эса баччабозлик ҳаромликлари ичida умр кечирадирлар эди. Умаро ва вукалонинг аксари ё Эрон асирларидан, ё баччалик қилганларидан мансабга кўтарилилар эди. Шижаот майдонида Темурларнинг, Шайбонийларнинг исми-шарифлари унутилгани каби илм майдонида Ибн Синолар, Форобийлар, маориф майдонида Али Қушчи, Улуғбеклар ёддан чиқиб, бутун Мовароуннаҳр бир хонақойи паришон ва диёри дарвешон ўлмиш эди. Илм, ҳилм, маориф, иззат-нафс ва ҳайсият (хурмат-эътибор) риёкорликка айланган эди. Буни сўзлар балки аччиқ сўзлардир, лекин тўғри сўзлардир. Тарих ёзидиган муаррих мадхия ёзидиган мирза эмас” (Бегали Қосимов, 1992 ).

Мана шу “хонақойи паришон” Ватанга, “дарвеш” ва “риёкор”лар миллатга айланмас экан, Туркистоннинг келажаги йўқдир. Бу Исмоил Фаспирали биргина Туркистон эмас, бутун Россия мусулмонларига ҳам тегишли деб таъкидлайди. Унинг фикрига кўра, юртда дарвешларнинг

**Аннотация:** Мақолада Марказий Осиёда фаолият олиб борган қаландарийлик тариқаты ҳақида ёзилған. Үндә ўлқадаги жадидларнинг мазкур тариқатга муносабати ва у ҳақида билдирган фикрлари баён этилған. Мақола қаландарларнинг жасамиятда тутған ўрни ва аҳамиятини ёритишга хизмат қилаади. Муаллиф маҳаллий олимлар ва дин аҳларининг ушбу тариқатга муносабатини очиб бершига ҳаракат қылған. Натижесінде ўлқадаги тариқатларнинг фаолияты ҳақида кераклы маълумотлар жамланған.

Қаландарийлик XI асрда маломатийлик ҳаракати негизида вұжудға келған бўлиб, дастлаб шариат нормалари доирасида фаолият олиб боргани, бирор үндаги тартиб-қоидаларнинг сирліліги ва мураккаблиги сабаби оммалашмай қолғани, натижесінде қаландарийликнинг асл мөхияти фақат “маломат”, “ихлас”, “фақр” мақомларидағина сақланиб қолғани очиб берилған.

Марказий Осиёда қаландарийликнинг юзага келишига асосий омил ҳаракат мақсадининг шариат ва масаввуф вакиллари орасида тарқалиб бораётган “риё” (ریه) нинг олдини олиш ва нағсни ислоҳ қилишига қараштылғанлығи ҳамда ушбу иллатларнинг муолажасида “сидқ (тұғрилік) ва “ихлас” (холислик) гояларига кенг таянғани исботланған. Ўрта асрларда қаландарийлик ҳақидағы танқидий қараашларнинг шаклланишига Эрон тариқатларига хос бўлған “ваҳдат ал-вужуд” (Яратувчи ва яралышынинг бирлиги), “хулул”, (Илоҳининг маҳлүқ танасига ўтиши) “тансух” (руҳнинг күчіб юриши) гояларининг сингиб қолиши сабаб бўлгани асослағ берилған.

XIX–XX асрларнинг биринчи чорагига келиб Туркистан үлкасининг иқтисодий-ижтимоий таназзули натижеси сиқида олдиң аҳолининг қаландархоналардан бошпанда бағараз егулик топши имконияти мавжудлиги учун қаландарлар сафи кўпайиб, қаландархоналар сони 100 га етгани очиб берилған.

**Калит сўзлар:** қаландарийлик, қаландархона, мурид, солик, тариқат, зұхд, сұфийлик.

**Annotation:** This article is about the Qalandarian tariqah operated in Central Asia. The author states the attitude of the Jadids in the country to this tariqah and their views expressed. This article serves to highlight the role and importance of Qalandarians in society. Also the author tried to show the attitude of local scholars and clerics to this sect. As a result, the necessary information about the activities of sects in the country has been collected.

Qalandarianism arose in the 11th century on the basis of the Malamatiyya movement, and at first it operated within the framework of Sharia norms. However, it did not become popular due to the secrecy and complexity of its procedures. As a result, the true essence of Qalandarism was preserved only in the statuses of “malamat”, “ikhlas”, and “faqr”.

It has been proven that the main factor in the emergence of Qalandarism in Central Asia is the prevention of “riya” spreading among the representatives of Sharia and Sufism and the reformation of the self, and the widespread reliance on the ideas of “sidaq” (righteousness) and

“ikhlas” (impartiality) in the treatment of these ills. It is argued that the formation of critical views on Qalandarism in the Middle Ages was due to the absorption of the ideas of “wahdat al-wujud” (the unity of the Creator and the creatures), “hulul”, (the transition of God into the body of the creature) and “tanasukh” (transmigration of the soul) characteristic of Iranian sects.

It has been revealed that, by the first quarter of the 19th-20th centuries, as a result of the economic and social decline of the Turkestan region, the number of qalandars increased, and the number of qalandar houses reached 100.

**Ключевые слова:** қаландария, қаландар, қаландархана, ищущий, путник, орден, аскетизм, масаввуф.

**Аннотация:** Эта статья о тарикате каландаров, действовавшем в Средней Азии. Автор описывает отношение джадидов страны к этому тарикату и высказанные ими мнения. Эта статья призвана подчеркнуть роль и значение каландаров в обществе. Автор попытался показать отношение местных ученых и духовенства к этому тарикату. Раскрыто, что, возникший в XI веке в исламском мире тарикат каландария на базе движения маламатия, являлся тарикатом соответствующим шариату, но не обрел популярность из-за свое закрытости и сложности правил, в итоге истинная суть каландаров сохранилась только на макамах “маломат”, “ихлас”, “фаэр”.

Доказано, что основным фактором возникновения тариката каландария в Центральной Азии являлось стремление предотвратить “лицемерие” и реформирование «желаний» распространяющихся среди представителей шариата и суфизма, а при исправлении этих недугов опирались на идеи «правоты» и «беспристрастия». Обосновано, что, причиной формирования критических взглядов о каландария в средних веках стала внедрение идей свойственных тарикатам Ирана, таких как “ваҳдат ал-вужуд” (Единство Творца и творимого), “хулул” (Переход Всевышнего в тело творимого), “тансух” (переселение души).

В статье раскрывается, что, к первой четверти XIX–XX веков в результате экономического и социального упадка Туркестана и падения уровня жизни населения, отсутствия них возможности найти кров и пищу, количество каландаров увеличилось и число т.н “каландархона” достигло 100.

**Key words:** Qalandarism, qalandars' house, murid, salik, tariqah, asceticism, Sufism.

күпайишига сабаб дин пешволарига нисбатан ишончсизлик, дин аҳлини мол-давлатга берилган деб коралаш, уларга нисбатан норозилик кайфияти сабаб деб кўрсатилган.

## НАТИЖА

Жадидлар ушбу даврнинг бевосита гувоҳлари сифатида Туркистондаги қаландарлар аҳволининг бу қадар танглигини миллатнинг инқирози билан боғлаганлар. Уларнинг ҳолига ачиниш билан қараб, ислоҳ қилишга чакиргандар. Қаландарларга хунар ўргатиш лозимлиги, одамларнинг ғашини келтирувчи ташқи қиёфасини ислоҳ қилиш кераклиги уқтирилади. Нафакат дарвешлар, балки оддий аҳоли орасида ҳам иқтисодий танглик кузатилгани маълум эди.

Абдурауф Фитрат “Машраб” номли мақоласида шоирнинг ҳаёти ва ижодига тўхталарап экан, Машраб билан алоқадор қаландарийлик тариқатининг тарихи ва Марказий Осиёда тутган ўрнини ўрганиш лозимлигини таъкидлайди. Бу тариқат аъзоларининг фаолияти тарихнинг кам эътибор қаратилган жиҳати эканини қайд этади. Мақолада: “Машрабнинг синфий тусини очмоқ учун қаландарлик маслакининг синфий моҳиятини белгиламоқдан бошқа чора йўқ. Лекин бахтга қаршу, бизнинг тарихимизнинг ҳеч текширилмаған ёхуд оз текширилған саҳифаларидан бири шул қаландарликдир. Узим ҳам бу тўғрудағи бутун излашларимнинг “мана!” деб кўрсатарлик бир натижаси бўлмағанини эътироф қиласман. Қўлимдағи жуда оз материал билан қаландарлик маслакининг синфий моҳиятини очмоқ ва шу йўл билан Машрабнинг ҳам синфий тусини кўра олмоқ мумкин бўлмайдир. Шундай бўлса ҳам, бундан сўнграги текширишларга балки ёрдами бўлур умиди билан қаландарлик ҳаққида билганим нарсаларни қайд этиб ўтмакни муносиб кўраман. Ўрта Осиёда тасаввуф мусулмонлиқ билан бирга келиб кенг бир суратда тарқалди. Ўрта Осиё тасаввуфининг кубравия, яссавия, нақшбандия ва қаландария каби кўб оқимлари ўринлашған... Бундан ярим аср – бир аср бурунги замонга келган, Ўрта Осиё шахарларининг энг обод жойи қаландархоналар эди. Қаландархоналар шахар халқининг жума кунлари чиқиб ўтирадурғон дам олиш, саёҳат жойлари эди... Бизнинг фикримизга кўра, феодализм идорасининг бутун оғирлиги остида қолиб эзилган, бор-йўқларидан айрилғон, эзувчи кучга қарши

курашмоқ умидини батамом йўқотғон, шахсий ҳаётларини таъмин учун қўлларидан ҳеч хунар келмаган бир гурӯҳ бўлғонлар. Булар тиланчилик билангина таъмил этилмақда бўлғон ҳаётларининг аччиқ дақиқаларини нашанинг мастилиги остида кечиришга тиришконлар” (Абдурауф Фитрат, 1991).

Фитрат мазкур мақоласи орқали Машрабга қаландарлик тариқати вакили сифатида нисбат берилшига қаршилигини баён қиласди. У нақшбандийлик сулукидан бўлиб, қаландарлик ҳаёт тарзини ихтиёр этган киши сифатида тилга олинади. Авваллари уларнинг жойлари сўлим ва дам олиш маскани бўлгани, вакф ва хонликлардан келадиган ҳадялар эвазига фаровон ҳаёт кечиргандарни тилга олинади.

Муаллиф қаландарлар ва уларнинг ташқи қиёфаларини мазкур мақола орқали очиб беришга интилади. Ўзидан кейинги тадқиқотчиларни эса мазкур тариқат юзасидан чуқурроқ изланиш олиб боришга чақиради.

## МУҲОКАМА

Жадидчиликнинг кўзга кўринган вакилларидан бири бўлган Чўлпон ўзига дастлаб “Қаландар”, “Мирзоқаландар” каби тахаллуслар кўйиб ижод қилгани ҳам сир эмас. Эл орасида эса, “Чўлпон” номи билан кўпроқ танилди. У ўзининг қайноқ ички түғёнлари асосида ёзган қаландарона қарашлари билан шухрат топиш билан бирга, кўплаб танқидларга ҳам учради. Чўлпон ўзига хос фикрлаши, қолипга тушмаслиги, эркин ижодни севиши туфайли эҳтимол ўзига “қаландар” тахаллусини бергандир.

## ҚАЛАНДАР ИШҚИ

Муҳаббатнинг саройи кенг экан, йўлни йўқотдим-ку,  
Асрлик тоши янглиг бу хатарлик ўйлда қотдим-ку.  
Карашма дengизин кўрдим, на нозлик тўлғини бордир,  
Ҳалокат бўлғусин билмай, кулочни катта очдим-ку.  
Ажисб дунё экан бу иши дунёси, аё дўстлар,  
Бу дунё деб у дунёни баҳосиз пулга сотдим-ку.  
Унинг гулзорида булбул ўқиб қон айлади бағрим,  
Кўзимдан ёшини жо айлаб, аламлар ичра ботдим-ку.  
Қаландардек юриб дунёни кездим, топмайин ёрни,  
Яна кулбамга қайгулар, аламлар бир-ла қайтдим-ку.  
Муҳаббат осмонида гўзат Чўлпон эдим, дўстлар,  
Кюёшининг нурига тоқат қиломай, ерга ботдим-ку.

Боку, 1920 йил.

Чүлпон дунёни кезувчи қаландарнинг мақсади Яратганни топиш эканини мисол келтирад экан, бу йўлда қидирганини топа олмаганига урғу бермоқда. Дастрлаб “Қаландар” тахаллуси билан ижод қилиб, кўзлаган мақсадига ета олмаганини, Чўлпон юлдизи каби бўлганида эса, қуёш (Яратган) нурига бардош беролмаганига ишора қилмоқда.

Жадидларнинг кўзга кўринган яна бир вакили Абдулла Қодирий (Жулқунбой) жамиятнинг бир бўлаги бўлган қаландарлар хақида куйиниб гапиради. Бу хақида Султон Содиков “Ширкат” мақоласида шундай ёзди: “Инқилобнинг биринчи йили фирмaga янги кирган кезларим эди. У чоқларда Тошкентда гадо, қаландар, маддоҳлар кўп бўларди. Улар куни билан бозорларни тентираб, ҳазрати Фавсул Аъзам, Баҳоуддин номларини талқин қилиб, нон, пул, мева-чева йиғар эдилар-да, Ҳожим бемалолнинг такясида (Чорсудаги эски хаммом орқасида) тўпланишиб, жами бемазаликларни қилиб ўтиришар эди, на оила ғамини ер, на сиёsatни тушунар, на дунёда нима бўлаётганини билар эдилар. Эски шаҳар фирма қўмитаси менга ана шундай бекорчи дайдиларни йўқотиш, уларни ишга ўргатишни топширган эди... Бир куни атайлаб мулла Абдуллани бошлаб, шу такяга кирдим. Чой чақириб, Абдулла билан сўзлашиб ўтиредим. Гадой, қаландар, маддоҳлар тарёқ – кўкнор иchar, иккинчиси наша чекар, яна бириси оғзига келганини ўтлаб, ҳангома сўқир эди. Мен уларни кўрсатиб, мулла Абдуллага: – Бу бекорчи сабилларни йўқотиш керак, ишга жойлаш керак, – дедим.

– Кошки эди, – деди Абдулла, – йўқотилса катта иш бўларди, илож қани? – Ширкат очамиз, уларни ишга тортамиз, ёрдам берасан... – дедим. Абдулла кўнди. Чорсу билан Эски намозгоҳ ўртасидаги жарлиқда Боқижонбойнинг пахта заводи бўлар (Боқижонбой инқилобдан кейин заводни ташлаб кетган) эди. Ана шу заводни наматчилик ширкатига айлантиридик. Мен раис, Абдулла саркотиб бўлиб иш бошладик. Ҳар куни икковимиз Ҳожи бемалолнинг такясига тушиб ҳалиги бекорчи гадо-қаландарларни ишга ундеймиз, ташвиқот қиласиз, Абдулла бўлса, эълон ёзди, қўлида қофоз-қалам ишга борадиганларни рўйхат қиласи... Шундай қилиб, ширкатимиз бошда бироз ривож топмай турса ҳам, кейинчалик жуда гуруллаб кетди. Даромад дуруст бўлгани учун улар бир-бирини “тортиб” кела бошладилар. Кўп гадо, қаландар, маддоҳлар ўз хунарларини тарқ қилиб, ширкатда ишлаб кетдилар.... (Султон Содиков, 2004).

Абдулла Қодирий зиёли киши сифатида шундай оғир даврда бекор ўтирган ва ўзининг кимлигини унуган қаландарларга йўл кўрсатиш тарафдори эди. Уларни оиласига қайтаришни ўзига мақсад қилган эди. Мехнат қилиб, тириклик қилишлари учун қўлидан келган барча ҳаракатни амалга ошириди. Натижада, тушкунликка тушган, ақлини йўқотган қаландарлар ўз ҳаётларини тиклашга муваффақ бўлдилар.

1920 йилда Абдулла Қодирийнинг “Иштироқион” газетасида “Тиланчилик ёхуд енгил касб” (Абдулла Қодирий, 1920) номли мақоласи нашр бўлган. Мақолада ёзувчи ўзи яшаган даврда ижтимоий жиҳатдан муаммоли ҳолатга келган қаландар ва маддоҳлар масаласини кўтаради. Уларни ишёқмасликда айблайди. Қаландарларнинг ўлка бўйлаб кезишлари ва фарзандларини ҳам шу куйга солишларига кескин қарши чиқади. Болаларни енгил ҳаётга эмас, меҳнат ва илмга ўргатиш зарурлигини уқтиради. Уларнинг жамиятдаги ўрнини қуидагича келтиради: “Қаландар, маддоҳ... исмли сафилларимизнинг ичиди катта-катта бойлари бор бўлғани каби, топқан оқчаларини қимор, нашахоналарда барбод берувчилари ҳам ўзларига етмаган шекилли, ёш, маъсум болаларини ҳам бу ёмон касбга қурбон этмақдадирлар. Бу бадбахтларга: “Ўзинг-ўзинг, энди ўғлунгни ўқутуб бирор касб ўргатсанг яхши бўлмайдирми?” десанг: “Эй-й, бу касб бизнинг ота-боболардан қолиб келмакда бўлған иш. Ҳар кимга ўз ота касбини қилмоқ керак!” жавобини берадирлар... “Ижтимоий таъминот” исминда кучдан-куватдан қолмиш меҳнаткашларга ёрдамхоналар очмишлардирким, бу сойилликга карши бир чорадир. «Ижтимоий таъминот»лар бизим саломат вужудлик, юзлариндин қон томар маддоҳ, қаландар исмли енгил касбчиларимиз учун эмас, балки қари, ишка ярамовчи, кўр, шол касалли, сағир, етимлар ва шуларнинг амсоли учундир. Ишка нокобил заифаларимизнинг “Ижтимоий таъминот”лари бўлиннатириб-да, кўчаларда залиона кезинишлари бундай муассасаларнинг борлиғиндан бехабарликдан ёхуд илгариги сойиллик лаззатини унута билмаганлиқдан бўлуб, бунинг тевишли чорасига киришмак ўз аҳлининг биринчи навбатдаги вазифасидир” (Абдулла Қодирий, 1920).

Мақолада Абдулла Қодирий жамият ривожи учун ана шу каби иллатларни бартараф этиши масаласини кўтаради. Кам таъминланган оилалар

учун ажратилган ижтимоий таъминотдан қаландар ва маддоҳлар фойдаланишига қарши бўлади. Улар кучга тўлган йигитлар, мусулмон бўлатуриб, енгил ҳаётга кўнишиб қолганини қоралайди. Ногирон ва бокувчисиз заифаларга ажратилган ёрдамдан ҳақ олишга нолойик деб билади. Фарзандларини бу йўлдан сақлаш кераклигини, илм ўргатиш зарурлигини куйиниб гапиради.

Шунингдек, Абдулла Қодирий “Ўтган кунлар” романининг “Зулм ўчоги” бобида ҳам Худоёрхон даврининг авжига чиққан зулмлари ҳақида ҳикоя қиласди. Унинг майда савдогарлар қатламига қилган зулмининг натижаси мадрасалар, боғлар ва шу қаторда бузиб қайта таъмирланган қаландархоналарга ўзи ва оила аъзолари номини бериши ҳақида ёзди. Худоёрхон иккичи маротаба таҳтга ўтирган вақтида эса, вазият ўзгариб, аёвсиз сиёsat йўлига ўтганини, ҳар қандай қаландархона, ўрда ва боғлар фаолиятига чек қўйилганини ёзди. Ўша вақтда бозорлар, расталар орасида қаландарларнинг овози, талқинлари эшитилиб турганлиги ҳақидаги маълумотларни ҳам учратишимииз мумкин (Абдулла Қодирий, 1994). Бундан хulosса қилиш мумкинки, у давр нафақат хонлик, балки диний ва бошқа соҳалар ҳам ғарқ бўлиб бораётган бир давр эди.

Абдулла Қодирий ўша давр муҳитини кўз олдимизга келтириш учун ҳолатни қуидагича ифодалайди: “Айниқса, 1917 йил ўктабр “инқилоби”дан сўнг кўплаб обидалар “инқилоб”ни тушунмаган ёки қабул қилмаган кимсалардек муқим ерларда “отиб” ташландилар. Ўзингизга маълум, Ҳўқанди латиф улкан бир ҳудуднинг: Кошғардан тортиб Ўрунбурғача, Бадахшондан Ейиккача (Ўрол) бўлган давлатнинг пойтахти, доруссалтанаси эди. Шу боис бу шаҳарда бошқа маъволарга қараганда масжиду мадрасалар, қироатхоналар, ҳаммому карvonсаройлар кўплаб курилган.

Сайд Мухаммад Худоёрхон даврига келиб, пойтахтда етмиш иккита мадраса, беш юз олтмиш олтида масjid, ўтиздан зиёд қорихона, сўқирхона (кўзи оқизлар таълим оладиган ва кун кечирадиган маскан), бир неча қаландархона ва етимхоналар мавжуд эди. Айни савобли ишга кетадиган харажатлар шаҳарнинг ўзига тўқ фуқароларидан тушган хайр-эҳсонлар ва аксари давлат ажратган вақф мулкларидан йиғилар эди (Ўлкани ўрганиш дарулосори, 1823). Шарқ ўтмишида халқнинг иқтисодий маданиятини белгиловчи омиллар

асосан, ҳаммомлар, карvonсаройлар, қироатхоналар бўлган. Шаҳар кўргони ичидаги ўн икки ҳаммом, йигирма олти карvonсарой ва ҳар бир масжиду мадраса қошида қироатхоналар бўлган (Ўлкани ўрганиш дарулосори, 1823).

Қаландарлар ўз шайхлари бошчилигига жамоавий тарзда ҳаёт кечирганлар. Қаландархона кўп кишилар истиқомати учун мўлжалланган бўлиб, у ерда яшовчилар сони таълим оловчилар билан бирга икки юз кишигача етадиган бўлган (А.Л.Троицкая, 1975). Улар ўз масканларини хонақоҳ ёки қаландархона деб аташган. Қаландархоналар мамлакатнинг деярли барча ҳудудларида, жумладан, Бухоро, Самарқанд, Тошкент, Кошғар, Ҳўжанд ва Хивада ҳам бўлган. Марказий Осиёда кенг фаолият юритган қаландархоналар орасида нуфузи ва мавқеи жиҳатидан кўзга кўрингани бу Тошкент ва Самарқанддаги қаландархоналар эди. Шу сабабли бўлса керақ, кўпроқ шу икки ҳудуддаги қаландархоналар ҳақида маълумотлар кўп учрайди.

В.В.Верешагин 1867–1868 йиллар Тошкентга сафар уюштиради. Айнан қаландархонада маълум вақт яшаган ҳам. У ернинг шартшароитини яхши ўрганиб, суратлар билан ўзининг қимматли маълумотларини қолдирган. Унга кўра, тиланчилик қилувчи ва дарбадар кезувчи қаландарлар истиқомат қилувчи жой номи “қаландархона” бўлган. Қаландархона яшаш учун жуда қулай, соя-салқин, сувга яқин баҳаво жойда жойлашган. Қаландархоналар ўралган девор ва катта дарвозадан ташкил топган. Ички қисмida дараҳтлар ва масжид қад кўтарган. Бир томонда кўримсиз ва унчалик озода бўлмаган бино мавжуд бўлиб, бинонинг девори тагида банди қаландарлар кўкнори таъсирида маст бўлиб, ухлаб ётишарди.

Верешагин қаландарларга нисбатан хақоратомуз муносабатда бўлган. Энг ачинарлиси, турли ҳолатлар ўтга муболага асосида тасвиранган. 1873 йили Туркистон ўлкасидан қайтган Верешагин Лондонга суратлар кўргазмасини ўтказиш учун боради. У ерда Туркистондаги жанглар ва қаландарларнинг суратларини намойиш этади. Нашаванд қаландарлар ва бир қатор уларга оид суратлар кўргазмадан олиб ташланади. Арzon нархга Третьяков шахсий галлереясига сотиб юборилади. Сабаблардан энг каттаси расмларда объективлик йўқлиги ва билдирилган кўплаб ноўрин танқидлар эди.

Қаландарлар ҳар куни эрталаб қаландархонани тарк этиб, тиланчилик учун бозорларга йўл

олишган. Бу ҳол бўйдоқларга тааллукли бўлган. Аммо уйланганлар алоҳида ички уйда яшашган. Улар касб қилиш орқали оиласини таъминлаган. Ҳар бир аъзонинг ўз худуди бўлиб, уни айланиб тиланчилик қилган, кечга яқин қаландархонага қайтиб, таассуротларини ҳикоя қилган. Аслида қаландарийлар ақидасига кўра, уйланиш тақиқланган, аммо XVIII–XIX асрларга келиб, бу одат тартиби бироз ўзгаририлган. Яни, маълум кишиларга оила куриш мумкин бўлган. Юқорида айтиб ўтганимиз самарқандлик қаландар Ҳожи Сафо Валийнинг ҳам аёли, Мирзо Ёқуб исмли ўғли бўлгани манбаларда кўрсатилган (Т. Фаниев, 2009).

Ҳар бир қаландархонада бувахоналар ташкил этилган бўлиб, бугунги кундаги чойхона вазифасини ўтаган. Бундан ташқари бувахоналарда чой, нон, ширинликлар, палов ҳам тайёрланган. Бу нарсаларнинг ҳеч бири қаландарлар учун тақиқланмаган. Аксинча, барча шароитлар яратилган (А.Л.Троицкая, 1975). Верешагин уларни одам кўринишидаги устухон деб баҳолайди. Бир қаландарнинг қорадори қабул қилиб, маст ҳолатда эканида содир бўлган воқеани шундай ҳикоя қилади: “Бўйлари баланд, юзлари эса сарғайган ва бечорасифат, ўзи ориқ, сўзларимни базўр эшиятпти, атрофидаги ҳодисаларни эса мутлақо идрок этмаяпти. У менинг сўзларимни худди бир шовкиндеқ қабул қиляпти, аммо тушунмаяпти. Бир пайт менинг кўлимда қорадори донасини кўрди ва кўзлари катта очилиб, менга ташланди. “Бер менга”, деб бакиришга тушди. Бермаганимни кўриб, ёш боладек ялина бошлади. Йигламсираб, кўлимга талпинди. Унга бир бўлак қорадори узатган эдим, худди оч қолган ит сүякка ташлангандек уни еди. У бир оз ўтиб чехраси очилиб, мийифида кулиб юрди. Бошқа бир девона биринчисидан қорадори талаб қилиб, унга ташланди. Мен тушундимки, улар бу йўлда бир-бири билан ёқалашибдан ҳам тоймайди” (В.В.Верещагин, 1867–68).

Қаландархоналар нафақат қаландарлар учун, балки бошқа кишилар учун ҳам хизмат қилган. Верешагин у ерда баъзи таниқли кишиларни ҳам кўрганини ҳикоя қилади. Ёзда бу ер энг баҳаво ва қулай жой хисобланган. Дараҳтларнинг сояси, қушларнинг овози роҳат баҳш этиб турса, қишида мутлақ бошқа ҳолатни кўриш мумкин бўлган. Совуқда гарчи улар ўзларининг ямоқ либосларига ўраниб олишга уринсалар-да, барча аъзоларидан совуқ ўтиб кетади. Чунки димиқтирадиган иссиқдан сўнг Тошкентда аёзли кунлар қаттиқ келади. Шу боис қаландарлар яна ўша мастилик оғушида

совуқни енгиш учун бир-бирларининг пинжларига кириб, караҳт бўлиб ётадилар. Қаландархоналар ҳам совиб кетган, девоналарнинг қимирлашга холи бўлмайди (В.В.Верещагин, 1867–68).

Бозорда қаландарлар маълум тартибга кўра тиланчиликни амалга оширганлар. Жамоавий тиланчилик куннинг биринчи ярмида мева ва озиқ-овқат расталарида, иккинчи ярмида эса, тери бозорида амалга оширилган. Баъзан куннинг иккинчи ярмида хонадонларга ҳам боришган. У ерда “Арвоҳнома”ни ўқиб, садақа сўрашган. Рўза хайити куни эса “Етимнома”ни ўқиб масжид тагида йиғлашган. Одамлар уларга нима топсалар, бериб кетишган (А.Л.Троицкая, 1975). Кейин қаландарлар куннинг охирида бозор чойхонасида дам олганлар. Дам олишганидан кейин кийим бозорига ўтиб, у ерда “Ё Оллоҳ, дўст!” иборасини айтиб юришган. Бошчилик қилаётган қаландар баланд овозда айтса, қолганлари айрим жойларида қўшилиб туришган.

Бошқа бир тоифа қаландарлар ҳам бўлганки, уларни “жиловдор”лар деб аташган. Уларга бошчилик қилувчи қаландар эса “пешхон” бўлган. Бу гуруҳни “маҳсус тоифа” дейиш мумкин, улар садақа йиғиб олишда чангютигич каби фаолият юритганлар. Улар садақа берувчиларни ишонтиришда устаси фаранг бўлганлар. Бир одамнинг олдига келиб, у ҳақида ёмон туш кўрганини, агар садақа берса, ёмонликни бартараф эта олишини, унинг номидан дуо қилишини айтиб садақа сўрайдилар. Бошқа кишиларга эса, унга ёмон касаллик яқинлашаётганини, садақа берса, ундан фориг бўлиши мумкинлигини айтиб, пул сўраганлар. Уларга ўз фикрларини жуда ишонарли тарзда сингдиргандар. Одамлар уларга ишониб садақа беришган (А.Л.Троицкая, 1975).

Ҳар пайшанба қаландарлар яқин кунларда ўлик чиққан хонадонга борганлар. Улар ховлида қўшиқ айтиб, ўликнинг руҳини чорлаганлар. Бу чорлов қасидаси “Арвоҳнома” деб номланган. Бу қўшиқ ўлиб, танаси чириган ва суюклари тарқаган мархумнинг номидан ёзилган бўлиб, у ўз уйи ва оиласини кўргани ташриф буорган. У ғамгин ҳолатда уйига девор орқали кириб, аёли бошқага турмушга чиққанини ва болалари ғамгин ҳолатда қолганини кўриб, Яратганга нидо қилади. Қаландарлар шуни куйга солиб ижро этганлар. Қўшиқ охирида ўлик руҳи хурматланиб, Қуръон тиловат қилинган.

Тиланчилик якун топгач, қаландарлар қаландархонага қайтганлар. Бир кунлик маҳсулотга етарли пулни ажратиб олиб, қолганини эса,

тўрага тақдим қилганлар. Кечкурун ҳамма қаландарлар учун умумий егулик ҳозирланади. Бечора камбағаллар ва оиласи қаландарлар ҳам шу овқатдан тановул қилиб, оила аъзоларига ҳам олиб кетганлар. Бу каби тиланчилик орқали келган маҳсулотлардан тайёрланган таом “дегжўши мавлон” деб аталган (А.Л.Троицкая, 1975). Шу куни Қуръон ўқиб, ўтган барча шайхларнинг рухи эсланган.

Ёз ойларида ҳосил мавсуми келгач, гуруҳларга бўлиниб ва якка ҳолатда Тошкент (Паркент, Заркент, Еттикент, Пискент, Овлоқ ва бошқ.) атрофида жойлашган далаларга бориб, терим маҳсулотлардан садақа сўрашган (А.Л.Троицкая, 1975). Бу пайтда етакчи қаландар барча қаландарларга узоқ жойларга йигим учун боришларига руҳсат берган. Фақатгина тариқат аъзолари қаерда эканидан етакчи хабардор бўлиши шарт ҳисобланган.

Қаландарлар топган даромад қатъий равища да тақсимланган. Бу “тақсим” “бахра” ёки “қисм” деб аталган (А.Л.Троицкая, 1975). Баъзан тўра ўз ҳисобидан назр ҳам атаб турган. Одатда бу назр бир кўй бўлган. Бундай пайтда тўра қаландарларнинг етакчисига жонликни сўйиб, палов тайёрлашни буюрган. Бу таом барча қаландарларга ва шу жумладан бечораларга ҳам улашилган. Назрнинг каттагина қисми тўра ва етакчига ажратилган. Йилда бир марта Тошкент тўраси ҳалим тайёратлиб, бошқа Тошкент эшонлари ва барча қаландарларни, камбағалларни сийлаб, меҳмонга чакирган.

Қаландарларнинг етакчиси “отавой”, унинг ўринбосари “муовин”, қолган аъзолар эса “шўрокорлар” деб аталган. Отавой қаландарлар устоз ва шогирдларни тайин қилиш ҳуқуқига эга бўлган. У қаландархонадаги аъзолар фаолиятини назорат қилиб турган. Ҳар тонг қаландарларни гуруҳларга бўлиб, шаҳар кўчаларига тайинлаб, тиланчиликка чиқарган. Кечкурун эса, киримларни йиғиб олган.

Қаландарларнинг ёзги даромади қуйидагича тақсимланган. Учдан бири қуйловчига, бир қисми пулни йиғиб олувчига, қолган чақаларни ўқувчилар ва эргашиб боргандар олган. Пайшанба ва якшанба куни қаландарлар етакчи билан бирга қаландархонани тарк этиб, бозорни айланганлар.

Қаландархонада ўзига хос “ўқитиш институти” мавжуд бўлган. Бўлгиланган муддатни ўташ учун маълум босқичларни босиб ўтиш зарур бўлган. Қаландарларнинг фарзандлари ёшлигидан оталарига биринтирилиб, улар орқали қўшиқ,

талқин, достон ва қасидаларни ўрганиб боришган. Улар кўпинча оталарининг раъйига кўра қаландар бўлганлар. Туғилганларидан уларни қаландар қилиб тарбиялаганлар.

Аммо ташқаридан келган қаландарликни ихтиёр этганлар учун маҳсус таълим бериб борилган. Улар олти ойдан бир йилгача тариқат қоидаларини ўзластирган. Бегона киши қаландарликка қабул қилингач, тўра қаландарлар етакчисига унинг ота-онасини аниқлашни топширган. Унинг оиласи қандайлиги, отаси ўғри, онаси бетарбия бўлмагани текширилган, агар шу иллатлар уларда топилса, фарзанди ота-онасининг гуноҳларини такрорламасликка сўз бермоғи керак бўлган. Қабул қилинган янги аъзо қаландархонада истиқомат қилиши, тўранинг уй юмушларини, қаландарлик қоидаларини вактида бажариши шарт эди. Шайхнинг бўйруғига биноан янги вакилга қўшиқларни ва достонларни ёд олаётганини назорат қилиши учун бир бошлиқ тайинланган. У қўшиқларни ва достонларни ёд олаётганини назорат қилиб борган. Тошкентда қаландарликка қабул қилиш шартлари унчалик оғир бўлмаган. Аммо Марғилон ҳудудида бу ҳолат бироз мураккаброқ бўлган. Тариқатга кирмоқчи бўлган киши абдоллардан бўлиши шарт ҳисобланган.

Тариқатга кирган янги мурид бироз вакт ўтиб, шайхига қасамёд қилган. Фийбат қилмасликка, бегона аёлларга кўз олайтириласликка, ўғрилик қилмасликка, бирорни беайб урмасликка ва шу каби бошқа нарсалар юзасидан онт ичган. “Худони бир, сизни пир билиб, ёмон йўллардан ўзимни сақлайман”, деб сўз берган. Шундан сўнг пирга кўл бериш маросими бўлган. Агар мурид қаландар даражасига кўтарилса, тўра унга дўппи инъом этган. Бу нарса унинг биринчи суфийлик босқичини ўтаганидан далолат берган. Муридликка кирган киши баъзи бир удумларни бажариши талаб этилган. Бу расм-русумлар катта харажатни келтириб чиқарган. Чунки қабул қилинган шахс жамоанинг ҳар бир аъзосига либос ёки тўрага икки сидра бош-оёқ кийим, етакчи ва устозига ҳам шундай совға олиб келиши зарур ҳисобланган. Аммо маълумки, кундалик пул кунда топшириб турилгани боис муридларда маблағ бўлмаган. Буларнинг барчаси жамоа томонидан йиғилган пулга етакчи томонидан уюштирилган.

Ҳамма аъзолар йиғилгач, шайх тўрга чиқиб ўтирган. Устози белбоғ олиб келгач, уни шогирдига тақиб кўйган. Кейин бир пиёла сув олиб келиб, уни

мурид пиёласига кўйиб берган. Шундан сўнг шайх арвоҳлардан мадад сўраб, дуо қилган.

### ХУЛОСА

Ўша даврда юртнинг ҳар бир чеккасида қаландархоналар мавжуд бўлса-да, улар ҳақида тўлиқ ва тизимли бир китоб таълиф этилмаган. Улар ҳақидаги маълумотларни архив хужжатларида, жадидларнинг мақолаларида ва ўлкашуносларнинг ёзмаларида топиш мумкин бўлди.

Бу маълумотларни умумлаштирган ҳолда қаландарийлик тариқати вакилларига ҳалқ томонидан ҳамиша ҳам салбий муносабатда бўлинмаганини, уларга нисбатан хайр ва эҳсонлар мунтазам ажратилганини кўрамиз. Айнисса, аёллар томонидан назр-ниёзлар атаб турилган. Фарзанд туғилганда суюнчиси сифатида қаландарларга тўплаб матолар ҳадя қилиниб, таомлар улашилган. Дуоси қабул ва жамиятнинг эҳтиёжманд катлами сифатида мудом садакалар тортиқ қилиб турилган. Гарчи дин пешволари мавжуд бўлишига қарамай, оддий ҳалқ қаландарларга диндор ва валий кишилар сифатида қараганлар. Аммо дин вакиллари ўша вактда ҳам уларни танқид қилиб, одамларнинг дунёқарашига салбий таъсир этувчи кишилар деб коралаганлар.

Хулоса шундан иборатки, Туркистон матбуотида жадид намояндайлари ва жамиятдаги дин уламолари томонидан ўлқадаги қаландарийлар ҳақида салбий муносабат билдирилган. Бу даврда қаландарийликнинг моҳияти аслидан узоқлашиб, қаландархоналар ишсизлар ва тиланчилар учун бошпана манбаига айланиб қолган. Жадидлар даврий матбуоти ва илмий нашрларида жамиятдаги тартиб-қоидаларга амал қилмайдиган, тариқатга мансубликни даъво қилувчи қаландарлар фаолияти мунтазам танқид остига олинган.

### МАНБА ВА АДАБИЁТЛАР РЎЙХАТИ

1. Абдулла Қодирий. (1920). Тиланчилик ёхуд енгил касб// Иштироқион. 38-сон.
2. Абдулла Қодирий. (1994). Ўтган кунлар. Тошкент: Фоур Ғулом нашриёти.
3. С.Абдулҳаким. (1914). Қаландарлар ёхуд танбаллар. Тошкент: Садойи Туркистон. №1.
4. Абдурауф Фитрат. (1991). Машраб // Ёш ленинчي. – Тошкент: №6.
5. В.В.Верещагин. (1867–68). От Оренбурга до Ташкента. Москва: 1
6. Т.Ғаниев. (2009). Кўнгил дуржи. Тошкент: Fafur Ғулом нашриёти.
7. Абу Тоҳирхўжа Самарқандий. (2009). Самария. Тошкент: Янги аср авлоди.
8. Бегали Қосимов. (1992). Исмоилбек Гаспирали. Тошкент: Fafur Ғулом номидаги нашриёт матбаабирлашмаси.
9. Исмоил Гаспирали. (2008). Туркистон уламоси. (Ёқубжон Хўжамбердиев. “Соғуний”, – Тошкент: Шарқ нашриёти,
10. Султон Содиков. (2004). Абдулла Қодирий / Тўпловчи ва нашрга тайёрловчи Хондамир Қодирий. – Тошкент: Абдулла Қодирий номидаги ҳалқ мероси нашриёти.
11. А.Л.Троицкая. (1975). Каландары и маддахи // Домусульманские верования и обряды в Средней Азии. – М.: Наука.
12. Ўлкани ўрганиш дорулосори. (1823). Ҳужжат: № К.К.М. 5601 Д. П. 614.

